



Boletin informativo



Prikichi di India Oksidental

(Curaçaose Parkiet)

Aratinga pertinax pertinax

Prikichi, bistí na bèrdè bibu, ta hasi masha bochincha i redu den grupo, sintá den palu of bulando. Por mira nan hopi biaha den grupo chikí i promé ku kibrá di dia nan ta forma grupo mas grandi den diferente palu. Nan ta kome simia i fruta di vários mata, palu i káktùs.

Prikichi ta para, pues e ta vertebrado, di sanger kayente, e ta pone webu ku e ta brui.



Mas information di e departamentu di NME
(Natuur en Milieu Educatie) di Carmabi riba:

Wèpsait: www.carmabi-educatie.org

Facebook: [carmabi NME education](https://www.facebook.com/carmabi.NME.education)

Instagram: [carmabi nme](https://www.instagram.com/carmabi_nme)





Boletin informativo

Kustumber di bida

Promé kos ku ta yamativo di prikichi ta nan pluma bunita, kolorido manera arko íris: blou, bèrdè, hel, oraño.

E plumanan akí ta sirbi pa tene nan sanger kayente, ta isolá nan kontra freskura (ora di áwaseru), pa nan por move òf bula i pa kamuflá nan (ta difísil pa distinguí nan den palu bèrdè). Pero e bachi di pluma tambe ta sirbi pa señalá. Machu i embra ta rekonosé otro mihó, por ehèmpel.

Tin hende ta pensa ku tur pluma di para ta meskos, pero si bo opservá bon, bo por distinguí diferente tipo di pluma. Nan tin otro struktura i nan ta musta otro. Por parti pluma den tres grupo: pluma grandi, pluma tapadó i pluma fini fini. Pluma fini fini ta yen di plushi i ta sirbi pa para su sanger keda kayente. Mayoría di biaha ta haña nan pegá na su kueru. Pluma tapadó bo ta mira na e parti pafó. Pluma grandi ta esnan mas largu, mayoría di biaha na rabu i ala.

Prikichi yòn ta keda nèshi pa nan krese i haña suficiente pluma pa bula i bandoná nèshi. Ora di sali for di webu, prikichi ta nase sunú ku djis algun pluma fini fini. Beibi no por bula ainda. Ta mayor tin ku duna yu kuminda te ora nan a krese sufisientemente i nan bachi di pluma ta fuerte pa nan bula. Esaki ta tuma mas o ménos tres siman.



Aruba, Boneiru, Kòrsou

Na kada isla tin otro supespesie di *Aratinga pertinax* (nòmber sientífiko di prikichi).

Na Kòrsou tin *Aratinga pertinax pertinax*, na Boneiru *Aratinga pertinax xanthenus* en na Ruba *Aratinga pertinax arubensis*.

Tur ta otro. Prikichi na Boneiru ta esun di mas kolorido. Su frenta ta hel, su banda di kara i garganta ta di hel bai oraño. For di su pechu e koló ta transformá di hel bira koló di sitrun.

Prikichi na Ruba ta ménos flamante. Su pechu ta maron kla, pero su nèk i alanan ta bèrdè bibu i su punt'i ala ta blou.

Bo sa ku...?

Pa mucha sabí ku ke haña mas informashon tin hopi kos interesante riba nos wèpsait, manera blachi pa duna koló.

Tambe bo por bishitá nos Marine Education Center na Carmabi Piscadera!



Boletin informativo

Anatomia

Prikichi di India Oksidental su largura total ta mas o ménos 26 cm, inkluso su rabu di mas o ménos 13 cm. Su pluma tin koló bèrdè di yerba i nan tin un kolorashon di koko úniko. Su koko ta pa gran parti oraño-hel dòf i riba su kabes ta bèrdè. Parti riba su wowo tin un matis blou i su frenta ta oraño-hel.

Struktura di pluma ta: pluma fini fini ta e lag mas pegá ku kurpa, ku ta pèrkurá pa isolashon i stabilisashon di temperatura di kurpa. Despues tin pluma tapadó, tambe konosí komo pluma kontorno. Esaki ta pèrkurá ku e para no ta eksperensiá resistensha di airu ora di bula. Por último tin pluma grandi òf pèn na rabu. Prikichi ta usa esaki pa fasilitá bulamentu. Nan forma ta di tal forma ku e ta hasi posibel pa subi i baha i pa move manda dilanti.

Pik di prikichi tin poko koló.

E parti ariba ta fuertemente kurvá. Su pata ta kreá p fasilit'é sinta riba taki i subi tronkon di palu. Dos dede di pata ta mustra dilanti i dos patras.



Bo sa ku?

Ta fásil pa trein prikichi bira mansu. Esaki ta hasi e bestia mas atraktivo ainda pa hende ku gusta maskota lif.

Pa hasi nan mas mansu posibel, ta saka nan for di nèshi ora nan a kaba di sali for di webu i ta duna nan kuminda ku man di hende. Asta den park'i Kristòf, ku ta un área di naturalesa protehé, ta kibra nèshi di prikichi hòrta beibi.

Pues, por fabor, kumpra para ku no ta saká fo'i naturalesa, sino kumpra nan den petshop, i veriguá ku e animal tin un renchi numerá na su pata. Kòrda sí ku èihelek para tin ku biba liber den naturalesa pa bo por disfrutá mas tantu di dje. No sea egoista.



Boletín informativo

Diferensia entre prikichi i lora

Prikichi ta forma parti dje famia di lora. E famia akí konosé mas o ménos 350 tipo. Tur ta biba den área tropikal. Por rekonsé nan tur na nan bistuario kolorido yamativo.

Pero, kiko ta e diferensia entre prikichi i lora?

Na Kòrsou i nos islanan tin un tipo di lora so, esta *Amazona barbadensis*. Ora ta pone lora banda di prikichi ta fásil pa distinguí e diferensianan. Lora ta mas grandi i su garganta ta mas kòrtiku. Su pik 'i hak ta mas kurvá ku pik di prikichi. Ku e pik akí nan por kibra habri fásilmente nechi i simia duru. Su alanan ta mas rondó i su rabu mas kòrtiku.

Lora ta habitante di palu ku ta usa su pik pa subi palu, banda di su patanan. Na su patanan kòrtiku i sólido tin kuater dede pa pèrkurá ku e por kana riba taki. Nan ta traha nèshi den palu pues nan ta brui den kuebita. Meskos ku prikichi nan ta sosial i ta biba den grupo grandi. Nan ta keda fiel na nan pareha, pa henter nan bida.

Infortunadamente nan ta hopi solisitá pa biba den kouchi di hende. Danki Dios nan ta protehé for di aña 1952, pero ketu bai hende ta bende i kumpra nan ilegalmente.



Bida sosial

Prikichi di Kòrsou ta animal sosial. Mayoria di biaha nan ta den grupo di dos te ku algun dosena ku ta krusa bario òf mondi. Huntu nan ta rondia sondia pa kuminda. Nan no ta sali Kòrsou. Bula distansia largu di un tiru ta muchu difísil pa nan.

Nan kuminda ta konsistí prinsipalmente di fruta i nechi. Nan sa kome bonchi òf baliña di indju, wabi i dividivi i ora nan a deskubrí pal'i fruta henter e trupa ta baha riba dje i nan ta yena nan barika na nan antoho ku mango, kenepa, shimaruku i asta tamarein. Tambe nan gusta fruta di passiebloem, kadushi, datu, mespel i sorsaka. Nan no por laga maishi chikí para sin kom'é. Bo sa ku apel di manzaliña no ta dañino pa nan i ku nan sa savori'é? Bon mirá nan ta kome tur peulchi, simia, fruta i nechi ku nan topa.

Kuidou ora bo ta haña bo bou di un palu kaminda nan ta sinta kome. Prikichi ta masha slòrdu. Nan ta tuma dos, tres hap di un fruta pa seguidamente lag'é kai, kisas nèt riba bo kabes. Es mas, gustosamente nan ta pupu komiendo.



Prokreashon

Prikichi ta usa muraya di kalki, nicho i skref den baranka, i tambe tronkon di palu i nèshi di komehein pa traha su mes nèshi.

Ora prikichi skohe pa un nèshi di komehein, e ta usa su pik pa hak un hanchi kurvá ku un diameter di 7 pa 10 cm i un largura di mitar meter. Na fin di e hanchi e ta traha su nèshi. E forma paden di e nèshi ta oval i e kasita tin un diameter di 25 cm i un altura di 15 cm.

Prikichi no ta traha nèshi den nèshi di komehein bashí, sino e ta usa nèshi habitá. E komeheinnan ta permití prikichi usa parti di nan nèshi. E kalor ku e komeheinnan ta produsí ta yuda keinta brui webu di e prikichinan.

Beibi prikichi ta basta seif den su nèshi, pasobra soldá di komehein ta protehé nèshi balentemente, tambe kontra enemigu di prikichi chikí. Kon straño por zona, komehein no ta ataká ni kome prikichi i viseversa tampoko



Boletin informativo



Komportashon ora di brui

Den mondi bo por mira nèshi grandi di lodo kologá na basta kaminda. Mayoria di biaha bo por deskubrí e buraku di entrada. Si tin beibi den e nèshi ainda, bo por ta sigur ku e mayornan ta masha serka ta kana warda. Si bo bini muchu serka, e mayornan ta bula lanta gritando duru, pa spanta kita bo for di nèshi.

Prikichi ta brui den temporada di áwaseru of nèt despues di dje. Pasobra e ora ei ta mas fásil pa haña kuminda. Ora tin hopi kuminda, esta mas periodo di yobida ku un pa aña so, nan lo brui mas tantu, pues mas ku un biaha pa aña. Ora tin skarsedat di kuminda prikichi no ta pone webu.

Webu ta blanku i tin kaska duru. Normalmente ta pone sinku webu.

Prinsipalmente bo ta haña prikichi den mondi, kaminda e tin aksesu na kuminda i protekshon kontra bestia feros òf hende. Tambe por detektá nan den seru seku na nòrkan. Den e áreanan ei nan ta biba di baliña di dividivi, wabi i indju. Mayoria di biaha nan ta traha nèshi den baranka di kalki.

Ora e periodo di sekura dreña, prikichi ta buska refugio mas tantu den bario. E ora ei su dieta ta konsistí mas di fruta, manera mango i kenepa. Ora solo baha nan ta bai drumi den grupo grandi den tòp di palu. Despues di a hasi masha bochincha i disputa tokante ken tin mag di sinta drumi riba e taki korona.





Bo sa ku?

Den naturalesa prikichi no ta niun tiki sosial ku hende, pasobra e para tin miedu di nos. Lamentablemente, tin hende yagdó ku ta tene òf bende nan komo animal di kas. Hopi biaha ta hòrta kita nan for di nèshi ora nan ta beibi ainda. Ta buta e beibinan akí den kouchi chikí kaminda nan ta muri pa motibu di falta di bon kuido.

Hòrtamentu di e animalnan akí ta sosodé na un manera masha kruel. Yagdó ta pone bòter den buraku di entrada tap'é pa mayor no por drenta mas. Hopi beibi ta muri pa falta di kuminda i kuido. E prikichi mucha ku ta sobrebibí tin un chèns limitá pa keda na bida. E kuido ku e tin mester di dje ta algu ku hende no por suministrá. Hopi biaha ta destruí e nèshinan tambe. Tin yagdó ku ta tira ku hagel prikichi yòn ku ta siña bula.

Pues si bo ke kumpra prikichi òf lora, pensa dos biaha si bo por duna e kuido ku para tin derecho riba dje. I si ta asina leu ku bo ta bai kumpra unu, pèrkurá ku e ta kriá i e tin renchi. Sigur no kumpra prikichi ku yagdó a hòrta kita for di nèshi i su mayornan.

Bo ke sa mas tokante prikichi?

E ora ei, purba buska mas informashon riba internèt, basá riba lo siguiente:

Prikichi ta para masha sosial, bibá den grupo. Kua tipo di animal tambe ta sosial?

Organismo tin nòmber sientífiko, latin. Prikichi di Kòrsou ofisialmente yama *Aratinga pertinax*. Kiko ta e nòmber ofisial di hende, yuana i kabritu?

Nos ta deseá bo hopi prèt buskando i lesando mas informashon.